



Komunikadu Imprensa

6/20/2013

Ministériu Públiku kontinua falla utiliza artigu ne'ebé apropiadu ba kazu violénsia doméstika

Iha 18 Juñu 2013 Tribunál Distritál Baucau prezide julgamentu leitura sentensa ba arguidu kazu krime ofensa ba integridade física simples ho nia natureza violénsia doméstika. Tribunál konklui kazu ne'e ho pena prizaun fulan 7 maibé suspende ba tinan 1 fulan 6 iha liur. Kazu ne'e rejista ho Nú. Prosesu :157/Crm.S/2012/TDB no involve husi arguidu VS hasoru nia fen FE. Kazu ne'e akontese iha 10 Abril 2012, iha Sub-Distritu Venilale, Distritu Baucau.

Ministériu Públiku akuza katak iha 10 Abril 2012 arguidu deskuti malu ho vítima no foti ai-pedasuk ida baku iha vítima nia ulun, tuku dala barak iha vítima nia isin loloon no iha vítima nia matan fukun.

Iha loron tuir mai vítima halai ba iha vítima nia inan-aman nia uma, arguidu tuir ba ho tudik ida sona iha vítima nia ulun. Tanba ta'uk vítima halai ba ailaran, maibe arguidu duni tuir no dudu vítima to'o monu ba iha rai. Vítima hetan kanek iha ulun no ain, bubu no moras iha matan fukun no isin loloon tomak.

“JSMP lamenta teb-tebes tanba Ministériu Públiku falla atu utiliza artigu ne'ebé apropiadu ba kazu violénsia doméstika ne'ebé tuir loloos tenki akuza ho krime mais-tratus ba kónjuje la'os ofensa ba integridade física simples”, dehan Diretór Ezekutivu JSMP, Luis de Oliveira Sampaio

JSMP hanoin katak tantu Ministériu Públiku no Tribunál tenki avalia no faktu sira ne'ebé asociadu ho krime nia realizasaun (*modus operandi*).

Tuir JSMP nia hanoin krime ne'e apropiadu liu atu akuza ho maus-tratus ba konjuje ne'ebé defini iha artigu 154 Kódigu Penál, tanba arguidu uja sasan kro'at atu realiza krime ne'e no iha evidénsia katak arguidu halo krime hanesan ne'e dalabarak ona maibé vítima tauk atu halo denúnsia iha tempu ne'ebá.

Iha audiénsia arguidu konfesa faktus totalmente katak nia halo duni hahalok refere iha leten hasoru vítima. Mesmu nune'e, tribunál la halo alterasaun jurídiku kazu ne'e.

Julgamentu ne'e prejide husi juis singulár Dr. José Gonçalves, Ministériu Públiku representa husi Dr. Pascasio de Rosa Alves no arguidu hetan defeza husi Dr. Rui Manuel Guterres husi Defensória Públiku.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl